



partii naleraq

UKA 2017/116-01

19-10-2017

Ajunaarnersuarnik ajunaarnersuartulluunniit ittunik pisoqartillugu iliuseqapallattarnermut upalunaarsimangerup kommuninit akisussaaffigineqarnerata pitsaaqutaanik pitsaanngequtaanillu UKA2018-imut Naalakkersuisut nassuiaasiornissamik peqquneqarnissaannut Inatsisartuni aalajangiiffigisassatut siunnersuut.

(Inatsisartunut ilaasortaq Bendt B. Kristiansen, Inuit Ataqatigiit)

Inatsisartunut ilaasortap Bendt B. Kristiansen-ip Inuit Ataqatigiinneersup ajunaarnersuarnik ajunaarnersuartulluunniit ittunik pisoqartillugu iliuseqapallattarnermut upalungaarsimangerup kommuninit akisussaaffigineqarnerata pitsaaqutaanik pitsaanngequtaanillu UKA 2018-imut Naalakkersuisut nassuiaasiornissamik peqquneqarnissaannut Inatsisartuni aalajangiiffigisassatut siunnersuutaanut qujaluta, Partii Naleraq sinnerlugu imannak oqaaseqarfigissuarput:

Ajunaarnersuarnik oqarutta eqqaaqqaakkata soorunami siullersaraat upernaq manna Nuungaatsiami ajunaarnersuaq inuit inuunerannik alianaqisumik kinguneqartoq.

Taamaammallu aamma manna iluaatsillugu Nuungaatsiarmit tamaasa ajunaartullu ilaqtai misiginneqatigingarpavut.

Soorunami aamma Illorsuarmit tamaasa misiginneqatigeqaagut, Nuungaatsiarmituulli aamma nunaqarfimminniit pigisatik tamaasa qimaannarlugit qimangutsinneqartariaqarsimasut.

Aamma manna iluatsillugu ajunaarnersuarni suleqataasimasut ikiuuttut ikiuiniarnernillu assigiinngitsunik ingerlatsisut tamarluinnaasa qutsavingaangut, ajunaarnersuup kinguneranik sulii ajornerusumik eqqungaasunut misigisaqarfiusinnaaneraluanik minnerulersitsisunut tamanut, tassami ikiuiniarnerit assigiinngitsut ingerlanneqarsimangikkaluarpata, ajunaarnersuup kingunipilui sulii ajornerusimassangaluarpata. Aamma danmarkimiit, Islandimiit Savalimmiuniit allaniillu taperserluarneqarnerput qutsavingaarput.

Nalunngilarput pinngortitami ajunaarnersuit naatsorsoruminaassinnaasartut aammalu ilaanneerilutik tassanngaannaq takkussinnaasartut, kisianni ajunaarnerit annerusut minnerusulluunniit inuit

uagut nammineerluta mianersuaalliorntsigtut pisinnaasartut akisussaaffigisinnaangatsigit, tamakku pinaveersimatinneqqarnissaat tamatta akisussaaffigalugulu pisussaaffingaarpud.

Taamaammad ajunaarnerit uagut nammineerluta pilersissinnaasavut sapinngisarput tamaat pinaveersimatinneqqarnissaat aamma atuarfinni ilinniarfinnilu paasisitsiniaanerunikkuq qaammarsaaviginerusariaqarparput.

Nalunngilarput ajunaarnersuaqarsinnaaneranut sillimaniarnermut piareersimanissamut annaassinarsinnaanermullu pilersaarusiortoqartartoq aamma taakkununga sungiusarnerit sumiiffiit ilaanni assigiinngitsutigut ingerlanneqartatut.

Soorunami ajoraluartumik ajunaarnerit assigiinngitsut annerusumik minnerusumilluunniit immami, nunami illoqarfinni, nunaqarfinni sumiluunniit pisinnaasarpud. Taamaammad sumiluunniit sukkulluunniit sillimaniarnissaq pisariaqartuaannarpoq.

Sårunami pisariaqarpoq pisortat sorliit sunik qanorlu pisussaaffeqarlutillu qanoq akisussaaffeqarnersut ersarissaavigissallugu pisariaqarmat siunnersuut taperserparput.

Anthon Frederiksen